

UVOD

Cilj, problem i predmet istraživanja

Mikrokreditiranje podrazumijeva odobravanje malih kredita vrlo siromašnima, odnosno odobravanje kredita za projekte samozapošljavanja koji donose dohodak i omogućavaju samostalno osiguranje egzistencije pojedincima i njihovim porodicama, a time utiču i na ekonomski standard jedne zemlje. Mikrokreditne organizacije, za razliku od banaka, svoje poslovanje obavljaju sa klijentima koji nisu u mogućnosti osigurati neka sredstva kao koalteral, i koja nemaju ili imaju vrlo male prihode.

Mikrofinansije smatraju se jednom od najvećih inovacija od kraja prošlog vijeka i spadaju u relativno novu oblast u finansijskom sektoru.

Mikrokreditiranje nije specifičnost samo nerazvijenih zemalja, već je veoma popularno i u zemljama sa visokim ekonomskim standardom, i od svog postanka širilo se jako brzo.

U SAD, koja važi za izuzetno razvijeno ekonomski područje, radi više od 2 miliona mikro poduzetnika koji su pokriveni odgovarajućim programima razvoja mikroproduzetništva.

Cilj istraživanja ovog diplomskog rada je prikazati troškove obrade kredita u mikrokreditnim organizacijama u BiH, te izvršiti njihovo međusobno poređenje.

Problem kod ovog istraživanja jeste što mikrokreditne organizacije ali i velika većina banaka ne iskazuju pojedinačno trošak obrade kredita već je on iskazan kroz ukupnu efektivnu kamatnu stopu te o ovim troškovima klijent često bude upoznat prilikom zaključivanja ugovora odnosno kada je kredit već odobren.

Predmet istraživanja zasniva se na analizi troškova odobravanja kredita koje uzimaju mikrokreditne organizacija u BiH

Radna hipoteza

Troškovi obrade kredita predstavljaju sastavni dio troškova odobravanja kredita, koje klijent mora platiti prilikom odobravanja kredita i jednaki su troškovima obrade kreditima u bankarskom sektoru.

Naučne metode

U izradi ovog rada korištene su sljedeće metode: metoda indukcije i dedukcije, metoda analize i sinteze, te metoda deskripcije.

Struktura rada

Diplomski rad je sistematiziran u tri međusobno povezane tematske cjeline.

UVOD će se odnositi na ciljeve, problem i predmet istraživanja, radnu hipotezu, naučne metode, te strukturu rada.

U prvom dijelu rada objasniti će se nastanak i razvoj mikrofinansija u svijetu i Bosni i Hercegovini. O prvom dijelu objasniti će se i uticaj mikrofinansija na tržište Bosne i Hercegovine, a biti će objašnjeni i zakonski propisi kojima se reguliše osnivanje i rad mikrokreditnih organizacija u BiH.

U drugom dijelu rada objasniti će se poslovanje mikrokreditnih organizacija u BiH, gdje će se detaljno pojasniti trend poslovanja mikrokreditnih organizacija, zatim mikrokreditni proizvodi koji se nude klijentima, kao i procedure po kojima se odobravaju krediti u mikrokreditnim organizacijama. Pored toga o ovom dijelu obradit će se i finansijski podaci poslovanja mikrokreditnih organizacija u BiH, kao i nominalne i efektivne kamatne stope koje se primjenjuju na kredite u mikrokreditnim organizacijama u BiH.

U trećem dijelu obradit će se troškovi obrade kredita u mikrokreditnim organizacijama u BiH, sa praktičnim primjerima troškova obrade kredita koji se obračunavaju prilikom odobravanja kredita.

I u zadnjem dijelu, Zaključak, prikazati će se sinteza rezultata istraživanja kojima je dokazana postavljena hipoteza.